

九天應元雷聲普化天尊玉樞寶經集註上

海 瓊 白 真 人 註

祖 天 師 張 真 君 解 義

五 雷 使 者 張 天 君 釋

純 陽 李 佐 常 君 證

註曰九者陽數也乃天道也主於震宮故東南有九炁之說也即雷師出入之地也天者至大至聖无極無爲之炁也應者無物不承天命而生也元者至大也又曰萬善之長也乃四時之首也五行之先也雷者乃天令也掌生生殺殺之權動靜人莫可測萬神之奉行也聲者生也萬物得雷震聲而萌也又曰天不言以雷代言也普者上天下地四維八荒無形有形也化者天道陰陽運行則爲化又自無而有自有而無則爲化萬物生息則爲化老子云我無爲而民自化又云以德化是也天尊者至大至貴之稱也說者讚揚也闡教也解隱釋奧也王者天地日月之精華陰陽水火之結秀也潤而溫寶而貴萬載之不可

朽滅也樞者機也軸也乃生殺之始由也寶者珍重也經者徑也乃修真入道之要路也

義曰斯經以玉樞而名者乃天地之消息陰陽之動靜也元數乃乾元用九之說而

普化天尊居其上爲三界之尊十方之靈明矣

釋曰天尊發願廣大化及羣生其德不可量而機不可測也故以雷聲代化玉樞爲衡則善善惡惡殺殺生生皆聽於九炁之

真王所以三界萬靈十方諸天莫不皆贊我天尊之元化也

讚曰祖炁氤氲滿太虛九天元是九天居驅雷役雨飛金篆活物生人備玉樞三界有情同得道十方無路不通車大哉普化

明元始日月齊光信不誣

爾時九天應元雷聲普化天尊

註曰九天者乃統三十六天之總司也始因東南九炁而生正出雷門所以掌三十六雷之令受諸司府院之印生善殺惡不

順人情蓋以九炁之名者取其陽剛而不泯者之謂也應元者仰惟元始祖劫一炁分真玉清真王應元之體雷者陰陽二炁結而成雷既有雷霆遂分部隸九天雷祖因之以剖析爲五屬神霄真王用之以宰

御三界真王所居神霄玉府其道在乎巽巽者天中之地也東南乃九陽之炁結清朗光元始父祖化神霄玉清真王玉府在碧霄梵炁之中去雷城二千三百里雷城高八十一丈左有玉樞五雷使院右有玉

府五雷使院天有四方四隅分爲九霄惟此一霄居於梵炁之中在心曰神故曰神霄乃真王按治之所天尊臨蒞之都卿師使相列職分司主天之災福持物之權衡掌物掌人司生司殺檢押啓閉管鑰生成

上自天皇下自地帝非雷霆無以行其令大而生死小而枯榮非雷霆無以主其政雷霆政令其所隸焉三清上聖雷祖也十極至尊雷寶本也昊天玉皇上帝號令雷霆也后土皇地祇節制雷霆也北極紫

微大帝掌握五雷也五雷者天雷地雷水雷龍雷社令雷又有十雷一日玉樞雷二日神霄雷三日大洞雷四日仙都雷五日北極雷六日太乙雷七日紫府雷八日玉晨雷九日太霄雷十日太極雷又有三十六雷一日玉樞雷二日玉府雷三日玉柱雷四日上清大洞雷五日火輪雷六日灌斗雷七日風火雷八日飛捷雷九日北極雷十日紫微璿樞雷十一日神霄雷十二日仙都雷十三日太乙轟天雷十四日紫府雷十五日鐵甲雷十六日邵陽雷十七日欽大雷十八日社令雷十九日地祇鳴雷二十日三界雷二十一日斬孽雷二十二日大威雷二十三日六波雷二十四日青草雷二十五日八卦雷二十六日混元鷹犬雷二十七曰嘯命風雷二十八曰火雲雷二十九曰禹步大統攝雷三十曰太極雷三十一曰劍火雷三十二曰內鑑雷三十三曰外鑑雷三十四曰神府天樞雷三十五曰大梵斗樞雷三十六曰玉晨雷

有三十六神最當陳之於太上之前雷法有七十二階天地賞善罰惡發生萬物皆雷也雖陰陽之激剝亦由神人之興動雷鳴則雨降矣聲者天地之仁聲也春分五日雷乃發聲可聞百里震九天而動九地驚四海而飀四溟太上曰吾不發陰陽之聲吾之大音無以召故鼓之以雷霆以聲召氣也雷帝之前有雷鼓三十六面凡行雷之時雷帝親擊本部雷鼓一下即時雷公雷神興發雷聲也普化天尊者自浮黎元始天尊生九子玉清真王化生雷聲普化天尊天尊以歷劫應化隨時示號本元始祖劫一炁分真乃玉清真王九霄主宰一月四辰監觀萬天浮遊三界九州萬國賞善錄愆是為普化至大至貴也

雷大矣哉故三界十方天聖地真各有司焉惟九天玉清真王總治其令也聲乃炁之用炁乃聲之令明是辯非震萌起釁非雷之令何能生也普化天尊者天即我我即天發願廣大化形十方凡諸衆生能皈心向道我當以身身之非天尊普化而何釋曰是時九炁成形結為九天在三十六天之上十方三界之祖炁也所以用九之故其炁元本乎三清之體而用乎九天之名宜矣應元者天陽地陰理之然也蓋我天尊生乎陽而居於天其健而剛也所以萬物生乎地莫不皆聽命於天尊使物物各得其宜世人不知其故而本元皆出乎天尊之餘炁也天尊欲人人皆為天尊者何故惜其炁而應其本元之妙道也雷者類也是以出萬類而起羣品也孰不知雷乃陰陽二炁之激剝却有所司誠惡誅邪驅風役雨者何耶凡俗無知豈識元始生殺之機玉清真王之妙用也聲者令也聽也天無聲則雷霆不行地無聲則草木不

萌人無聲則清濁難明所以聲為一身之本乃陰陽之元炁也天無私日月無明天有德人物俱生是故我天尊代天行道德施三界使清者為聖濁者為賢凡諸有情有形者俾躋仙作共成一炁

讚曰九天九玄之又玄忽爾我後修焉我前姑九二炁雖分陰與陽玉清高處化真王上天下地能相合闡教分形徧十方祐應二炁之正五行之令斬鬼誅邪天人響應祐廣宣帝德起羣生三界英靈側耳

聽莫道老天無一語須知司今有雷鳴好生之德不能量闡教諸天及十方高處玉清治雷府萬神朝服禮真王

玉清

在玉清天中與十方諸天帝君會於玉虛九光之殿鬱蕭彌羅之館紫極曲密之房閼太幽碧瑤之策方洞微明晨之書交頭接耳細議重玄諸多陪臣左右踞踏

天尊宴坐朗誦洞章諸天帝君長吟步虛錄女仙妹散花旋繞復相引領遊戲翠宮羣仙導前節後鉞龍旂鸞輅飄飄太空並集於

玉梵七寶層臺

註曰在者其時也天尊遊於玉清天中與十方諸天帝君宴會於玉虛殿館紫極之房是時天尊檢觀太幽碧瑤之箱稽考洞微明晨之紀交頭接耳者蓋諸天帝君列

坐有次聖聖相傳共聽微密玄玄之言彼時諸天帝君亦各有眾多家臣左右踞踏恭謹侍焉天尊安然高座朗誦洞章諸天帝君深有所悟各各起座長吟步虛讚詠天尊之教絲女仙妹散花盤繞於天尊之

座復請天尊往詣翠宮之七寶層臺欲望天尊大演妙法也層臺即龍鳳之座有七級皆珍寶飾之故名七寶層臺天尊駕與白鶴師子威儀節仗引導其前青龍白虎六甲六丁侍衛左右九天仙女十二溪真

陳奏仙樂諸天帝大神君神王太極真人副從鳳輦龍輿經遊翠宮仙仗鉞龍旂鸞輅飄飄太空集聚寶臺

義曰是時遊玉清駐寶臺大闡玄文廣宣要語天人左右皆得開心受化而功行又

崇也

釋曰是時我天尊在自居之闕闕中有九光之殿館閣房位闡法考書欲化十方天真帝君明其大道於是天真帝君被德服膺不知舞蹈天尊大悅欲遊外宮諸天羣

仙左右前後仗鉞排旗引我天尊駐鸞輅於翠宮翠宮者玉清之行宮也雷師心懷奏疑無由以陳幸值我天尊登寶臺手舉金光明之如意俯察萬類

讚曰故把玄玄一竅開十方三界應時來瓊書細閱存元炁寶笈重宣養本胎侍女交頭心自會陪臣踞踏意能裁須更演教

天花舞鸞鳳飄飄七寶臺

時有雷師皓翁於仙衆中越班而出面天尊前頻顙作禮勃變長跪上白天尊言天尊大

慈天尊大聖為羣生父為萬靈師今者諸天成此良觀適見天尊閱寶笈考瓊書於中秘蹟不可縷計唯有玉霄一府所統三十六天內院中司東西華臺玄館妙閣四府六院及諸有司各分曹局所以總司五雷天臨三界

者也天尊至皇心親庶政此等小兆以何因緣得以趨服願告欲聞

註曰雷師皓翁乃帝臣元老師重臣也

玉霄府即高上神霄天中玉清真王府居三十六天之上天中有五殿東曰藥珠西

曰碧玉北曰青華南曰凝神中曰長生又有太一內院可韓中司東西二臺四曹四

局外有大梵紫微之閣仙都火雷之館皆有玉府左玄右玄金闕侍中僕射上相真仙真伯卿監侍宸仙郎玉郎玉童玉女左

右司魔諸部雷神官君將吏上統三十六

天東方八天謂高上道寂天高上陽岐天

高上洞光天高上紫冲天高上玉靈天高

上清虛天高上微果天高上正心天南方

八天高上道元天高上太皇天高上玄冲

天高上極真天高上梵炁天高上輔帝天

高上玄宗天高上歷變天西方八天高上

左炁天高上主化天高上符臨天高上保

華天高上定精天高上青華天高上景琅

天高上丹精天北方八天高上安燁天高

上廣宗天高上浩帝天高上希玄天高上

慶舍天高上天婁天高上變仙天高上昇

玄天東北上方高上敬皇天東南方高上移

神天西南方高上瓊靈天西北方高上昇

極天下鎮三十六壘每方有九陽梵炁以

應一年三十六炁每十日一炁上應天有

一帝統治一炁天仙神鬼功過付與本天

校勘功者列名本天過者因於本天天獄

凡善惡事三十六壘皇君奏上神霄玉府

而糾察也每天各有龍神與雷生殺伐暴

誅邪罔不由之四府者九霄玉清府東極

青玄府九天應元府洞淵玉府六院者太

一內院玉樞院五雷院斗樞院氏陽院仙

都火雷院諸有司者天部靈司蓬萊都水

司太一雷霆司北帝雷霆司北斗征伐司

北斗防衛司玉府雷霆九司及諸曹院子

司凡世間亢陽為雷風雨不時干戈妄動

鐵鏜存錄皆請命玉府經由玉樞大布分

野兼判三司將兵三界鬼神功過巨濟黎

民應雷霆諸司院府並佐玉樞之令稟聽

施行至於雷霆斧鉞慶賞刑威有條不紊

悉有分司或曰兼司行司巡察官司皆設

曹局官僚任職是以玉霄一府總司五雷

天臨三界者也

義曰天尊以瓊書錄及故化天真雷師點

會天尊之旨上請方便之門一時君臣體

異心同無非活羣生之徑路也誦經君子

至此當以雷師之心為心其功有自歸矣

釋曰時我天尊登寶臺察羣品似言不語

適雷師皓翁職專雷府班越天真以己心

而識上心故白之於天尊之前我天尊德

化無邊真元有自其玄書秘錄不可條請

故啓三十六天東西二臺府院諸司之政

莫不皆總之於玉霄一府其雷師皓翁以

此舉而發我天尊之未宣者雷師啓天尊

至大至聖心及萬品臣以微陋之材以何

緣由得侍玉宸願告天尊明我前劫以贊

元化并玉霄一府之事當屏氣而恭聽之

讚曰勃然長跪上啓真宗諸司院府臺閣

尊崇三十六所雲雷雨風何神不備何聖

不從職事生殺事在吉凶欲聞至說必啓
丹衷仁哉仁哉雷師皓翁

天尊言雷師皓翁爾等仙師儲勲夙世累行
昨生故得玉府登庸瓊宮蘭錄今茲勲行視
夙昨多爾其悉力雷司委心大部日復日歲

復歲勲崇行著性霽神融克證高真即階妙
道惟是雷部鬼神責勞夕役動有撻楚大則
考戮屑雲雕雪無有已時檄龍命鴉此息彼
作彼所因故爾其耳焉雷師皓翁及諸天諸
仙聳耳而默天尊所坐九鳳丹霞之床手舉
金光明之如意琅風清微綺雲郁麗天尊寂
然良久

註曰雷司布令行事疾如風火不可留停
降澤之處有方震雷之聲有數可早即早
可雨即雨必奉帝勅其雷司所行鬼神何
以致也蓋此等之人居塵世之上不忠不
孝不仁不義不禮三寶不修五常不惜五
穀所以身沒之後聽我雷司之驅役實此
等罪報也聞天尊所說善惡因緣雷師皓
翁及諸天諸仙聳耳悚懼天尊所坐之時

其神風琅琅然而清微彩雲鬱鬱然而華
麗沉靜良久欲對仙衆再演玄文也

義曰善根宜種惡業莫生天真尚然累功
積行何況後學君子可不盡心乎
釋曰雷師皓翁與天地同體日月齊明是

以天尊言儲勲夙世有大功於初始之先
行既累著而得精悉遂化成形故得玉府
進用瓊宮有名矣今又掌善司惡分化濟
人其功不少所以盡心於大部者乃雷師
皓翁之本情也加之日積月增名高行顯
以全元炁則性霽神融之不虛言也以是
能與高上真王爲明證之臣遂列大道之
階天尊以善惡兩途諭諸天真復引雷部
鬼神畫勞夕役周而復始無有休息所言
屑雲謂其奔走四方搏雲作陣之勞雕雲

者其冒凍乘風凝雨作花之苦也至於入
海檄其龍走林命其鴉東作西止東伏西
興無有息時此善惡之因故明矣天尊是
時語雷師曰吾得權大化位上真蓋心先
縫此道故得如是也爾等欲昇仙作讚化

玄文以吾之功爲功則道自成矣爾今聽
焉諸天帝君聞如是說皆聳耳而敬聽也

天尊之威儀不可宣說即有神風綺雲清
朗郁麗天尊與九炁復合爲一寂然而不
動也

讚曰善惡兩途持如影響善爲天真惡爲
魍魎

天尊言吾昔於千五百劫以先心縫此道遂
位上真意釀此功遂權大化嘗於大羅元始
天尊前以清淨心發廣大願願於未來世一
切衆生天龍鬼神一稱吾名悉使超渙如所
否者吾當以身身之爾等洗心爲爾宣說

註曰心縫此道者謂如裁段布帛若不縫
就焉能爲衣且天地一點元炁散徧太虛
六合人稟父母一點元炁在身即是祖宗
之遺體也若修之智慧定觀清淨之心收
聚七寶結成還丹是謂以心縫合成其大
道而位證上真又以天地化醇之炁大道
混合沖和之妙釀成巨功遂權大化提掌
天地隱顯莫測天尊於大羅元始天尊前

發廣大願願一切衆生天龍鬼神一稱名者悉使超渡如所否者天尊當以身身之此足見天尊普護人天發弘誓願也義曰幸得人身不可蹉過當守是道而誦是經日就月將與道合體非小補哉

釋曰得道之難合道之不易也我天尊昔於五百劫之初心先合此道即九炁之生形也故稱曰真王遂掌大化我天尊曾向大羅元始天尊前以九天不雜之真發三界無邊之願期在未來之世但受九炁之物有能歸吾化稱吾名者皆能起死回生

或不信從者我當以元始一炁化成九炁以復其初也天尊謂諸天帝君曰爾等當淨其心吾今爲汝等開大道之密緒也讚曰道乃天地心愚癡不解尋破永要縫補須用水磨針

天尊言爾諸天人欲聞至道至道深竄不在其他爾既欲聞無聞者是無聞有見即是真道聞見亦泯惟爾而已爾尚非有何況於道不聞而聞何道可談

註曰至道者不在其他在自己也爾既欲聞若明自己之道即是不必聞也是云無聞者是無聞有見即是真道若聞他人之說自己有見即是真道聞見亦泯皆不必聞見矣若謂非有既不聞道而欲聞不可與談道矣

義曰大道無形無我無彼有無無有即是真道也有爲有形道在何處入道之士當於無無處著脚

讚曰道道道道說者可笑天地我人一家

一竅

天尊言道者以誠而入以默而守以柔而用誠似愚用默似訥用柔似拙夫如是則可與忘形可與忘我可與忘忘入道者知止守道者知謹用道者知微能知微則慧先生能知謹則聖智全能知止則泰定安泰定安則聖智全聖智全則慧先生慧先生則與道爲一是名真忘惟其忘而不忘忘無可忘無可忘者即是至道道在天地天地不知有情無情惟一無二

註曰道者乃三界所由之路也然入則有由守必有方其用固有理也蓋道乃天地無爲之稱即人之真常也誠者端恪不移無妄之理也故惟以無妄之誠而入於真常之道然真常之道悟者自得故默識心融而後能守雍容不迫而後能用夫入不能守則非所謂入守不能用則非所謂守

故用真實者如愚而默雍和而不剛暴是亦如拙者何異焉然其爲愚訥拙也特如之而已亦豈真愚訥拙哉人能入之守之用之如是者則不特可與忘物而亦可以忘我至於物我俱忘亦忘其所謂忘矣何言乎忘形我者心不之動湛然常寂無彼此之間也知者識之明者見之真之謂也入道而知止守道而知謹則固循於道而不離用道而知微則能反約而不惑於遠

大此其道體之本原在是而一心之妙用所由生也則凡所謂無所不通無所不知乃本性之所具者至此亦復全於我矣原其所自則又皆本諸知止知止而後有定

定而後能靜靜定日久聰明日全天光內
燭心純乎道與道合真押不知孰爲道孰
爲我但覺其道即我我即道彼此相忘於
無忘可忘之中此所謂至道也至道在乎
天地之間而反不知其道之所在要知
者則凡有情之物我蠢動無情之山河草
木豈出於至純而不雜之外耶其惟抱一
爲天下式者知此凡人修真鍊道惟守一
而不雜則進德無魔昇舉有日也
義曰此章乃玉清真王入道守道體道之
端緒也奉玉樞大教之士於此再三研
窮自有所得則玉清真王之語不虛設矣
釋曰大道無言有言非道是故我天專言
前章至道深窈不可得聞也若此之論後
人皆不被天專之化其道有起有止無見
無聞起止見聞皆由心造昔我天專九炁
生而九炁成有何見耶有何聞耶此章乃
天專教導道修真之士用功守成之路必
以己誠而合天地之誠也蓋誠者一也夫
道一而生二二生三三生萬物莫不自誠

一而來者人能明誠而入用默而守用泰
而用然後得誠者似愚得默者似訥得泰
者似拙誠默泰爲體爲用愚訥拙爲道爲
實如是方可與道混然忘形忘我忘忘此
乃道之要而守之妙也人必要知止守必
要知謹用必要知微知微者則九炁之光
足矣能知謹者則萬靈之聖全矣能知止
者則三元之神安矣神安則智必備智備
則靈先生靈先生則本元之炁合矣故名
之曰真忘惟其忘而不忘忘無可忘者即
是真一之大道也
○
謹曰守一守一當用謹默無我無人却有
一賊若還捉住湛然凝碧
天專言吾今於世何以利生爲諸天人演此
妙寶得悟之者俾躋仙階學道之士信有氣
數夫風土不同則稟受自異故謂之氣智愚
不同則清濁自異故謂之數數繫乎命氣繫
乎天氣數所囿天命所桎不得真道愚可以
智濁可以清惟命俾之愚昏昏濁冥冥亦風
土稟受之移之天地神其機使人不知則曰

自然使知其不知則亦曰自然自然之妙雖
妙於知而所以妙則自乎不知然於道則未
始有以愚之濁之諸天聞已四衆咸悅
註曰凡人生處若土厚水深地氣多寒萬
物絕成造化之功厚故多壽也若土薄水
淺地氣多熱萬物速成造化之功薄故多
夭也此風土不同稟受之異也若人稟胎
氣清者爲人慈善端正忠孝智慧聰明樂
仙慕道之人也稟氣濁者爲人兇惡邪佞
狠毒愚癡悖逆無道不仁不義之人也智
愚不同清濁之異也氣數所囿如花木之
開發亦各有時皆稟天地之氣天命所桎
乃天命施於桎梏不善之人長淪惡趣不
得真道也愚者可以智慧門化之濁者可
以清淨門化之愚者常自昏昏濁者常自
冥冥此乃自然然而也皆風土稟受之分
配定矣蓋天地之生殺萬物亦隨其四時
之氣候也若智人得五行之氣陰陽之精
修之鍊之以保固其身命便與天地同久
日月齊明愚人只知聲色滋味而不知反

以害其命也是以學道之人當默而思之義曰天之生物皆得二氣之成形清氣多而質濁氣重而姦惡宜非風土之不齊稟受之自異者也

釋曰夫風土之不齊實氣數之所繫也是故我天尊舉此一章列大道之後者何也蓋世人失於調養肆意輕生孰不知輕清之氣爲天重濁之氣爲地凡爲人身得天氣成精成津成液得地氣成骨成肉成筋者也既稟二氣而生何故有修短賢愚之

分耶宜非風土之厚薄陰陽之偏塞耶蓋天之命如桔氣之數如圖言人人不可逃天命而越氣數惟我學道之士能崇此經則出於天命而拔氣數之外也我天尊說是言畢兩班御師使相諸天帝君雷師皓

翁踊躍讚歎至於天龍鬼神亦皆不知手舞足蹈之悅也

讚曰風土所宜亦由氣血水各有源人皆有劫輕清還玄重濁不白道本無二此心似月

天尊言吾今所說即是玉樞寶經若未來世有諸衆生得聞吾名但冥心默想作是念言九天應元雷聲普化天尊或一聲或五七聲或千百聲吾即化形十方運心三界使稱名者咸得如意十方三界諸天諸地日月星辰山河草木飛走蠢動若有知若無知天龍鬼神聞諸衆生一稱吾名如有不順者誠首剎心化爲微塵

註曰夫玉樞者即玉清之氣也玉爲至尊至貴故元始天尊稱玉清昊天上帝稱玉

皇太上道君稱玉晨太上老君稱高上玉帝也三清之都號玉京神霄真王稱玉清王者實中之尊貴也樞者天之樞紐也雷霆者天地之樞機天樞地機樞陰樞陽天本陽曰樞者乃顛倒之理也雖曰天陽地陰蓋天一生水也北斗食狼星號樞星貪狼配天元乃七政之首也如樞密院亦朝綱之樞機也總國之機密政務掌殺伐之目也玉樞之經乃天府之雷文也如有不順之人當剎心斬首皆在雷司之主令也

義曰天尊以好生之心爲心化形十方不使一物不被其澤也如有毀謗之者雷司誠首剎心宜矣

釋曰此章天尊發廣大之願明矣天尊念衆生其或衆生得化成真之後一稱我天尊之號蒙天尊之符至於世間山河草木飛走蠢動但稟二氣之物即當悚爾而聽毋敢少逆如不順者雷司不容則碎爲微塵也

讚曰天尊天尊發願廣大毀謗玄文雷司有寄

天尊言吾是九天貞明大聖每月初六及旬中辛日監觀萬天浮遊三界若或有人欲學道欲希仙欲進九玄欲釋三災當令正一道士或自同親友於樓觀於家庭於里社醮水鑽花課誦此經或一過三五過乃至數十百過即得神清氣爽心廣體胖凡所希求應其感

註曰天尊號貞明大聖夫貞者貞觀其天

地貞勝其吉凶而乃天地變化聖人效之
吉凶垂象聖人則之夫易乾元亨利貞
者四時為冬四方為北令亦屬此天一生
水玉清之祖氣也天尊每月初六及辛日
下降初六者六陽降而生乾六陰勝而生
坤消息升降周流六虛以為道極聖功生
焉神明出焉蓋天地生數一成數六天地
得之潤澤濟世六辛者天之水數天數當
先號六辛辛數乾天也天一生水皆先天
一氣之義萬天者自大羅清微禹餘大赤
王境之天周徧諸天無不監觀其天功
過至于三界無不浮遊察錄其萬靈功過
也若人誦此經者凡所希求悉應其感
義曰天尊言有情無情有知無知咸得成
真以宣大化自見其功德不可稱量也叩
之必應奉道之人可不勉哉
釋曰天尊降監之日恐世人不知誤犯天
律天尊惜羣生之念至於如此如或學道
希仙之士酌水獻花或親友或道士一誦
此經其得仙班有位天府標名或有一等

下愚忽起誠心課誦此經使之心廣體胖
或有孝子順孫齋心潔慮建壇場請誦
此經即得超昇所以釋三災這九玄皆得
如願無不感應
讚曰誠不用物以氣相臻一攝事統天地

回春

天專言身中九靈何不名之一曰天生二曰
無英三曰玄珠四曰正中五曰子丹六曰回
回七曰丹元八曰太淵九曰靈臺名之則吉
身中三精何不呼之一曰台光二曰真靈三
曰幽精呼之則慶五心煩懣六脉搶攘四肢
失寧百節告急宜誦此經

註曰九靈者人身中之本神也天生者玄
牝也無英者嬰兒也玄珠者谷神也正中
者泥丸夫人子丹者靈臺神也回回者貴
泰神也丹元者心神也太淵者腎宮列女
水府神也靈臺者主制五臟神也台光者
男女構精胞胎始榮與靈者魂也幽精者
魄也凡為人既知身中有此神靈何不時
時呼名鍊成一家則學道希仙無諸障礙

也若五心煩懣六脉搶攘誦此經則身中
諸神咸得以寧則使人安逸也

義曰三精九靈非外物也住我家慎勿
放出當今常侍左右朝真禮聖則易見而
易得也乃天尊恐人不知大道所在故以
此指之也

釋曰天有九曜人有九靈天有三台人有
三魂天之九曜失度三台遷位則水旱陰
晦人之九靈失守三魂妄行則災害生矣
如有此三者至心誦經焚符則三魂安九
靈息五心靜六脉和四肢泰百節無恙也
讚曰九靈九靈是我之精時時呼召永保
長生

天專言若或有人五行奇蹇九曜欹數年逢
刑衝運值剋戰孤辰寡宿羊刃劍鋒劫煞亡
神鬼門鉤絞緣遭破敗馬落空亡動用凶危
行藏坎墮即誦此經上請天官解天厄地官
解地厄水官解水厄五帝解五方厄四聖解
四時厄南辰解本命厄北斗解一切厄
註曰凡人五行不通九曜失度又值刑衝

及諸神熱動用行藏皆不順利大則天譴地責喪身隕命皆由三官五帝四聖二斗以主之歸命此經誦咒焚香告符則一切厄難皆能解釋

義曰三界之中為人最靈不知向上一步致使星辰戰剋行止輒軻急宜歸奉真文則三元五帝以消其罪也此章天尊令人知忌避而欲禳之

釋曰此言人之五行不利九曜作撓是也所以諸多神殺皆聽我天尊之勅如或有

人遭此禍患誦此經則天尊命本人之家司命六神上請天官解天厄地官解地厄水官解水厄五帝解五方厄四聖解四時厄南辰解本命厄北斗解一切厄蓋緣此三官五帝四聖南辰北斗亦乃天尊之有司也故云上請者欲人知天尊之所司之廣設也

讚曰地網天羅不可逃凶星臨併若為消誠心誦取天尊號玉篆金符急急燒天尊言沉痾伏枕痼疾愈身積時弗廖求醫

同效五神無主四大不收或是五帝三官之前泰山五道之前日月星辰之前山林草木之前靈壇古跡之前城隍社廟之前里巷井竈之前寺觀塔樓之前或地府三十六獄冥官七十二司有諸冤枉致此牽纏或盟詛咒誓之所招或債塚負債之所致三世結冤異劫與仇埒其咎尤庫其執對皆當首謝即誦此經

註曰沉痾痼疾伏枕淋瀝醫禱無效蓋三官五帝泰山岱嶽日月星辰城隍社廟里巷井竈靈壇古跡寺觀塔樓五道諸司地府冥官至於山川草木皆有神祇故誤冒犯或夙有冤牽負財致命或被入咒詛或自設謗違盟累劫以來與仇結冤皆當悔過發露罪尤請誦經咒焚此篆符而悉得消愈也

義曰此章專言人之積病及禁忌相刑當稱天尊之號則禍去而福來何必疑也釋曰凡人病染沉痾痼疾弗廖世藥無功陰神作撓或自咒或他詛或積塚或私愆

則冥府欲問究由欲追執對何以赦免即誦寶經焚靈符即時安逸也
讚曰陰譴陽罪沉痾是報禁忌犯之經符是禱

天尊言天官符地官符年月日時各有官符六方陽向背各有官符二十四大則官符小則口舌是有赤口白舌之神以主之凡諸動作與舉出入起居不知避忌如遇官符口舌則使人擊聒曉夜煎燒多招唇吻面是背非動致口牙盟神詛佛始於謗讟終於詬詆由是獄訟生焉刑憲存焉若欲脫之即誦此經遂得口舌潛消官符永息

註曰此章天尊言諸官符赤口白舌之神者乃天省下之惡曜也蓋因世人不修正道不畏公法瀆雷褻雨故遣此神以撓之若人犯者急誦此經焚諸符篆即得應時消滅矣

義曰人之行藏各有可否但自不能識其機而造其理也如或犯之此經能免也
釋曰天尊發願廣大施化無方此章專言

諸官符者蓋此神易犯難釋以致庶人一或干之則赤口白舌乘勢而生也而世人何不預誦寶經焚玉篆則此禍自滅矣讚曰天符地符人不可觸欲釋訟凶經象三告

吳

二十五

九天應元雷聲普化天尊玉樞寶經集註上

九天應元雷聲普化天尊玉樞寶經集註下

海瓊白真人註
祖天師張真君解義
五雷使者張天君釋
純陽字伯常君頌

天尊言土皇九壘其司千二百神土侯土伯土公土母土子土孫土家眷屬若太歲若將軍若鶴神若太白若九良若劍鋒若雌雄若金神若火血若身養若撞命若三煞若七煞若黃幡豹尾若飛廉刀砧如是等土家神然若人興修卜筮一或犯之即致病患以迄喪亡纔誦此經則萬神皆起天無忌地無忌陰陽無忌百無禁忌
註曰凡人動作興工不無有犯神煞其禍立至大則喪命小則官非可不慎歟依儀書篆行持誦經祈禱則百無所忌也
義曰天尊惜羣生至於如斯也亦云生亦土而死亦土殊不知土之爲害大尤甚也蓋土宜靜不宜動之謂也
釋曰天覆其地人孰不知蓋我天尊爲九

天之尊統制三界而九壘皇君眷屬家臣諸多惡煞害人不輕天尊用王文寶篆以鎮樓之使世間上士下愚凡動作之時百無禁忌也
讚曰萬物皆從戊己來偶然相犯即爲災

若非普化真文力處處皆爲白骨堆

天尊言世人夫婦其於婚合或犯咸池或犯天狗三刑六害隔角交加孤陰寡陽天羅地網難於嗣息多是孤獨若欲求男即誦此經當有九天監生大神招神攝風遂生賢子於其生產之時太一在門司命在庭或有冤愆或有鬼魅或有禁忌或有凶厄致令難產請誦此經即得九天衛房聖母點與托送故能臨盆有慶坐草無虞凡有嬰孩在於襁褓爲稱壇神玉座下一十五種鬼加諸惱害因多驚癩宜誦此經

註曰世人婚合產育皆有神然不知方向不避太歲偶爾犯之其禍不淺急宜誦經焚符以禳之則自安榮也
義曰凶吉兩途互相齒之如或不諧不育

天尊之號宜誦之必自然而釋矣

釋曰此章為人間婚姻子嗣係於天尊所屬凡嗣息聘嫁養育非小事也世俗罔知而室於勘合之私其誤多矣如或犯之夫北妻南子息艱得宜誦寶經焚靈符以釋之則自然夫妻和睦子孫昌泰也

讚曰夫婦人倫事兒男骨肉恩要令家道睦歸敬玉樞文

天尊言若人居止鳥鼠送妖蛇蟲螻蟻拋磚擲瓦驚雞弄狗邀求祭祀以至影響夢通及於姦盜而敢據其所居以為巢穴遂使生人被惑庭戶不清夜肅於梁畫瞰其室牛馬犬豕亦遭瘟疫禍連骨肉災及孳生淫祠祆社黨庇神姦帑客頻仍喪車疊出若誦此經即使鬼精滅喪人物咸寧

註曰蓋此等之家不崇綱常理道不畏天地神明口味厭穢章穢身履邪淫殺道不遵公法惟務私榮肆毒逞兇恣行不善是致鬼妬神憎祆邪競起若能悔過首謝誦經焚符即得禍亂不生人物安寧也

義曰壁壞盜入業重鬼來致使六畜興災家神不利天尊不以小故亦無大恩多誦經文其禍止矣

釋曰正氣如天邪魔敢犯蓋因世人治家不理干瀆神聰以致六神不居則邪氣乘間而入或鼠精蛇魑拋擲驚弄血陰無時甚至深昧家人其禍不測或盜人家財物移東易西皆此類也致使帑客喪門挾靈肆志即誦寶經焚玉符則人物俱得以安寧也

讚曰自作惡時邪亦作我行善處即天行世人忽有如斯難宜篆靈符誦寶經天尊曰九天雷公將軍五方雷公將軍八方雲雷將軍五方蠻雷使者雷部總兵使者真賺判官發號施令疾如風火有廟可伐有壇可擊有祆可除有祟可遣季世末法多諸巫覡邪法流行陰肆魔構是故上清乃有天廷禁鬼錄姦之庭帝由來祆考邪之房能誦此經其應如響

註曰經中凡二十一箇皆天尊言惟此章

云天尊曰蓋稱揚雷公將軍使者判官發號施令應響威德故不直言也巫覡之徒務行邪術妄構妖言魔構夫婦分離蠱媚女流苟合值此妖巫誦寶經焚符篆則雷司勦除應報如響人得安寧

義曰天地無私惟德是輔善惡之報動如影響學道之士體天心而明己心則禍患蠲消而福祿臻矣

釋曰此章乃天尊自贊雷司之聖也如此所以誅鬼斬邪興雲降雨皆我天尊勅下方行今世道俗難分或以不正之術壞人倫而犯天律誦此寶經焚符則立應如響豈不敬乎畏乎讚曰雷司明善惡善拔惡常誅邪法相侵害惟多誦玉樞

天尊言天瘟地瘟二十五瘟天蠱地蠱二十四蠱天瘡地瘡三十六瘡能誦此經即使瘟瘡清淨蠱毒消除瘡癰平復亦有其由或者先亡復連或者伏屍故氣或者塚訟墓注或者死魂染惹或者屍氣感招凡此鬼神或悲

思或恚恨牽連執證並緣注射並音榜乘隙伺間音乃得其便故此經者上通三天下徹九泉可以追薦魂爽超度祖玄太上達素車白馬大將軍以監之

註曰凡人患瘟疫瘧疾者皆有所致甚至絕滅一門牽連此六親若能誠心誦經焚燒符篆則雷司差素車白馬之將以拔之使人不陷此苦也

義曰瘟疫瘧疾有自來矣但能誠心潔已誦真文禮天尊則不罹此苦也

釋曰瘟乃不正之氣蠱乃無影之蟲瘧乃難愈之疾蓋此三者我天尊之言有自來矣祇緣復連相染屍氣相薰塚訟相呼之所致也復連者乃人之大厄也世人不知禳解故有絕門亡沒者也塚訟者七祖冤牽之所致也屍氣者地上原有速年棺柩化成小蟲或飛入飲食之中或落在器皿之內食之令人作蠱凡人遷居當誦經焚符以勦絕之

讚曰天地瘟疫瘧疾大苦禍有其由亦人

自取若誦玄文可拔七祖白馬將軍能爲作主

天尊言若或有人治蒙遠行賊盜騁姦五兵加害陸行則虎狼魑魅磨其牙水行則蛟龍鼉鼉張其頤或難賴有幽枉之魂或風濤有劫數之會前亡後化捉生代死能於此經歸命投誠故得水陸平康行藏協吉

註曰凡人出陸遇賊迎兵或逢蛇虎惡域山魃水行或值蛟龍鼉鼉作浪興風滯魄沉魂求生捉替或遭劫會或飄墮他方常預備符篆防之可水可火化去亦急誦寶號立免諸厄也

義曰出入動靜宜慎宜謹若能平昔奉持此經則此患何由而至也

釋曰動靜行藏須當慎之所以吉凶晦吝生乎動是故一動只一吉字其三字皆非美也出入可不謹乎凡欲遠行必須先誦寶經佩符命則吉無不利

讚曰水陸行藏世不無鬼神作耗暗潛圖一稱普化天尊號佩帶真王王篆符

天尊言亢陽爲虐雨澤愆期稽顙此經應時甘澍積陰爲厲雨水浸淫稽顙此經應時朗霽祝融扇禍飛火民居赤鼠遊城驚驚魃黎庶此經可以禳之海若失經魚鼈妄行洪水稽天民生墊溺此經可以止之

註曰此章天尊愛羣生之心切切久旱久陰實天地之氣不和乃人民之業難釋以致三界震怒水湧山崩祝融扇禍赤鼠與秋黎庶不安若人遭此歲時宜誦此經焚此符篆晴雨得宜人民自安也

義曰陰陽失律如旱暵勢莫非出入於天司之令蓋惡業之氣不消正真之道不崇也天尊斡旋造化以生生之心長養羣品其不可讚歎耶

釋曰陰晴晦明非細事也上繫天庭下開洞府亦由二氣之不和故也凡遇此水旱之時志士嚴置道場誦靈文而焚玉篆則早可雨而雨可晴矣

讚曰水旱爲災可開天地誠心誦經晴明甘澤

天尊言世人欲免三災九橫之厄即於靜夜稽首北辰北辰之上上有三台其星並躔形如雙目疊為三級以覆斗魁是名天階若人見之生前無刑囚之憂身後不論沒之苦斗中復有尊帝二星大如車輪若人見之留形住世長生神仙歸命此經投心北極即有冥感斗為天樞中有天罡在內則為廉貞在外則為破軍雷城十二門並隨天罡之所指罡星指其身在未所指者吉所在者凶餘位皆然若人見之壽可千歲

註曰北辰者北極星也辰星五位乃帝座星也居常不動而眾星皆共之也此北斗居天之中為天之樞紐輪運四時凡天地日月五星列曜六甲二十八宿諸仙眾真及下元生人上自天子下及黎庶壽祿貧富生死禍福幽冥之事無不屬於北斗之總統也太上授以天師張真君北斗經訣若有危厄急告北斗禮誦本命真君方獲安泰又得三台生三台養三台護也三台星有六座上中下台名天階者太上昇降

之道也其勢橫亘北斗第二魁星上台虛精中台六淳下台曲生乃星君內諱知星名者東惡消除諸善備至見星象者生無刑憂死無諸苦凡於靜房端坐思三台覆頭次思兩腎氣從腎出與三台相連久久思畢嚙齒二七鼻微微出氣閉口滿咽而畢乃呪曰節節榮榮願乞長生太玄三台常覆我形出入往來萬神携榮步之五年仙骨自成步之七年合藥皆精步之十年上昇天庭急急如律令可叩頭瞻仰拜禮則百事皆遂又北斗乃陰陽之精神也精曜九道光陰十天七現二隱世人惟見七星不見尊帝二星此二星即輔弼帝皇太尊最君乃天地魂魄之威神輔星主天曰常弼星主地曰空空者九天之魂精常者九地之魂靈天休地泰空常隱藏天否地激空常煥明變化萬氣改易陰陽四時代謝莫不由焉二星尊貴隱伏華最九天亦祕其靈音不行於世諸得道高仙貴真乃得見之其營名逐利流俗穢濁之人星光

所不臨照難可得見也曩亦有誤見之者今俗人脫有誤見者切不可言泄則身被兵火卒形獲考地獄生死父母皆受罪於三官瞻禮之法常以每月初三日二十七日夜勿令人知陰下中庭燒香禮誦呪曰尊帝二星北極之靈願臣早見見即長生福慶無窮天與長齡誠心更念此經點有感通久久自當見也亦不可泄其天罡名在斗樞之內星形與破軍星相對此星紅色稍大每一時辰隨斗杓照臨地支一方位時時運轉無有停息經云天罡所指晝夜常輪是也雷城按地支有十二門雷欲發聲却隨天罡其時所指方位之門乃發聲也且如天罡坐於未對指丑宮何故却有吉凶蓋天罡正氣能生能殺若所指向之處即是生方故有生氣取之則可以治病補虛安神旺氣却禍消災延生度厄也所在之處則有殺氣用之可以斬鬼驅邪夷兇禁暴戾毒制魔故曰所指者吉所在者凶也

義曰九曜三台乃一身之主宰為萬象之樞機也學者當依法而朝奏之無不應響釋曰三台之星尊之大之其斗中二尊帝之星者何也乃天地之魂魄造化之樞機也夫學道之士徒知朝真禮斗之誠而不解瞻仰尊帝二星之捷徑也又有天罡之星在北斗之後隨雷門開處而指雷門十二者乃十二時經旨明言所指者吉所在者凶即是雷門也學者欲朝斗瞻星則法見於註內見之則人壽永而福厚也

讚曰玄門之妙人言深奧功行成時當朝九曜

天尊言世衰道微人無德行不忠君王不孝父母不敬師長不友兄弟不誠夫婦不義朋友不畏天地不懼神明不禮三光不重五穀身三口四大七耗七小斗殺生害命十人百已千姦私邪淫妖誣叛逆從微至著三官鼓筆太一移文即付五雷斬勘之司先斬其神後勘其形斬神誅魂使之顛倒人所鄙賤人所嫌害人所怨惡以至勘形震屍使之崩裂驅其捲

水役其驅車月數旬校復有考掠一聞此經其罪即滅若或有人為雷所瞋其屍不舉水火不受即稱九天應元雷聲普化天尊作是念言萬神稽首咸聽吾命

註曰人一有犯理應誅滅豈雷司天府一轟之即今伏法遭刑刀兵水火但死於非命者皆是也蓋人始以小惡為之不改日積月增遂成大咎罪已彰著又不悔悟三官太一考覈文移五雷之司先斬神魂伺其時至然後施行其死魂却聽雷司驅役擗考也若人改過還善歸命此經其罪即滅凡有男女為雷所瞋冠幘髮不被燎去亦可歸告天尊取自聖裁萬神皆聽其命令也

義曰三綱五常乃萬古不易之理宜容悖逆而妄行耶殺乃民之命國之寶豈可不珍惜而愛護耶近世淺薄不忠不孝不義不仁崇奢侈而惡清談賊道德而習姦詐致使橫禍疊至何不思之天尊幸開大路宜履之行之則諸惡不生矣

釋曰人生天地之間稟二氣備五常履仁義而守忠孝何故恣意輕生為諸不道之事大則雷司震怒暴屍於市小則官府加刑於身是故善可為而惡不可作也雷司以不仁之人驅役作善之士自當保拔也如有稱天尊之號者則萬神無有不拱聽者也

讚曰忠孝當為本陰陽即我家要消諸惡業不必誦南華

天尊言此經功德不可思議往昔劫中神霄正清真王長生大帝所曾宣說至士授經皆當刺金置幣盟天以傳雷師皓翁長跪拜興重白天尊言是經在處當令土地司命隨所守護雷部按臨以時稽審若人家有此經至誠安奉即得祥煙滿庭慶雲陰軒禍亂不萌吉福來萃於其亡沒不經地獄所以者何死即往生生歸善道承天尊力有此靈通出入起居佩帶此經衆人所欽鬼神所畏遇諸險難一心稱名九天應元雷聲普化天尊悉得解脫

註曰天尊發大慈悲說是寶經上利諸天下濟羣品至士受經必用金帛為信以質其心告盟十天然後傳付其金帛者但欲質心盟天豈較多寡金帛雖微盟約實重大聖非吝惜而不普及恐人輕慢故諄切以諭雷師天宜令土地司命在處守護也若人侍奉天尊持誦經號致感聖真降庭故祥雲繚繞生奉真詮則死歸善道更能依式篆符書寫此經至誠佩帶諸難不生人神敬畏也

義曰此章之意令人誠信不欺後學君子當依經而行則庶幾其不差也
釋曰雷師皓翁拱聽天尊至化喜不自勝於是長跪再白天尊曰自今而後至士受經當以金帛盟心以傳其文是經在處宜令土地司命隨所守護雷部按臨以時稽審如此奉誦則門庭有慶宗祖超昇佩帶之者人所欽敬鬼神畏服遇難則稱誦天尊之號悉得解脫故此經功德則不可思議也

讚曰不貴黃金貴赤心初真學道外魔侵至誠肯與盟天地剋日教君聽玉音
於是雷師皓翁對天尊前而說偈曰
无上玉清王 統天三十六 九天普化若
化形十方界 披髮騎麒麟 赤脚踏層冰
手把九天炁 嘯風鞭雷霆 能以智慧力
攝伏諸魔精 濟度長夜魂 利益於衆生
如彼銀河水 千眼千月輪 播於未來世
永揚天尊教
時雷師皓翁說是偈已

註曰此章雷師皓翁頌有所得故說是偈以稱揚天尊好生大德之萬一所以文義溜亮語言華澤其功德力可勝言哉
義曰天尊之德無可以體雷師皓翁故以銀河喻之乃言其天尊之元氣至清至貴至聖至明者也
釋曰雷師皓翁心服神通無以贊歎遂作此偈然我天尊所統三十六天之尊化十方世界之廣遊諸天時披紺髮而騎麒麟破九霄時赤其足而躡層冰手把九天炁

者即金光明之如意也嘯風鞭霆乃天尊之號今也斬鬼除妖濟物利人此乃天尊利益於衆生也銀河之水人不可見不可測之玄玄也千眼千月輪者使諸有情歸教之士猶如天尊之在目前也發願廣大永闡天尊之教
讚曰贊歎天尊誠哉是偈普化無邊祖劫一氣

天尊言此經傳世世人未知吾今所治九天應元府府有九天雷門使者以糾錄典者廉訪典者佐之復有四司一曰掠刺司二曰積逮司三曰幽枉司四曰報應司各有大夫以掌其事吾之所理御師使相咸贊元化
註曰天尊自言所治之司官兵將吏善惡各付其職所以生殺之樞皆由天尊之命令三界萬靈莫不皆奉行也
義曰此章天尊自言善惡功業各有所司皆贊成元化也
釋曰此章經問已畢慮後學之士不知所治之屬所以列言凡所祈求諸司官吏將

兵聞吾之號令咸贊元化也

讚曰設司分屬掌雷震風火飛廉號令明
善賞惡誅如影響九天元不順人情

天尊說是經畢玉梵七寶層臺天花繽紛瓊
香繚繞十方諸天帝君咸稱善哉天龍鬼神

雷部官眾三界萬靈皆大歡喜信受奉行

註曰說經已矣諸天帝君雷部鬼神悉皆
贊歎踴躍而去凡我同志信士善人得遇
寶經當洗心滌慮主誦朗誦真文則禍難
不萌永保長生者也

義曰宣經贊化三界十方皆得如意夫學
者得遇寶經玉篆可齋心滌慮酌水獻花
如法誦之篆之則諸禍不生衆善駢集也
今至士體天心而洗已心閱真文而造玄
文豈可不盡力奉持以廣大其化也哉

釋曰寶經玉篆非奉三清上境之勅玉清
真王之令則不能垂示於世而化諸有情
者也今經旨校正註釋分明玉篆金章燦
然燦目凡祈請之士可不齋心潔滌以閱
玄文也耶至士道齡職守都功位居左院

用已神元結之英成天尊普化之德是日
文成泰列聖真之左而誦經者不可藥漬
大則天誅小則禍及也
讚曰寶經圓滿咸稱善哉消災赦罪禍去
福來

九天應元雷聲普化天尊玉樞寶經集註下

圓滿吉祥靈章


向來誦經 念念存誠 千真拱聽
萬聖通靈 應元合無 普化分形
九天有命 三界遵行 消災謝過
請福延生 功圓行滿 大道證明

符篆


凡書一篆當焚香起大敬心至誠誦誦自
正經首至於三章并所析本章畢然後心
存天尊寶相口誦天皇神咒書之常時仍
用黃紙貼護篆文用則展啓以後符文一

體如之


學道希仙第一章




召九靈三精第二章
遇本命生辰歲時萬成
誦經稱號書篆焚之




解五行九曜剋戰刑衝第三章




沉痾痼疾呪詛冤牽第四章




消口舌唇吻第五章




穰土皇神煞禁忌第六章




水嗣息衛產難保嬰孩第七章




滅島妖蛇孽第八章




遣祟除妖滅邪巫覡禱第九章




消除蟲瘡超度祖玄第十章




水陸行藏第十一章




禱雨祈晴止穰水火第十二章




瞻星禮斗第十三章



聞經滅罪第十四章



佩奉華福人欽鬼畏第十五章



續婚合章

凡有嬰孩在於極樛為拊禮神王座下一十五種鬼加諸惱害因多驚癩宜誦此經謹按釋藏護諸童子經中載拊禮神王座下一十五種鬼形常遊行世間恐怖嬰孩

及小兒作諸怖畏之相人能誠心誦經焚符則免此禍也

第一名彌洲迦鬼形如牛著諸小兒眼睛

回轉

第二名彌迦王鬼形如師子著諸小兒數

數嘔吐

第三名騫陀形如鳩摩羅天神諸小兒其

兩肩動

第四名阿波悉魔羅形如野狐著諸小兒

口中沫出

第五名牟致迦形如獼猴著諸小兒把拳

不展

第六名魔致迦形如羅刹女著諸小兒自

齧其舌

第七名閼彌迦其形如馬著諸小兒喜啼

喜笑

第八名迦彌尼形如婦女著諸小兒樂著

女人

第九名黎波域其形如狗著諸小兒現種

種雜相

第十名富多那其形如猪著諸小兒眠中驚怖啼哭

第十一名曼多難提形如貓兒著諸小兒

眠中喜啼喜笑

第十二名舍究尼其形如鳥著諸小兒不

肯飲乳

第十三名捷吒波尼其形如雞著諸小兒

咽喉聲塞

第十四名目佉曼茶形如熏狐著諸小兒

時氣熱病下痢

第十五名藍婆其形如蛇著諸小兒數噫

數噫

玄陽子所遇雷霆玉經本末如是如是其

必有自來矣不以自秘方將梓而廣之其

所以與人為善之志甚焉予雖未識其為

人固已先識其為心知其非尋常人也雖

然至道無言至言無跡神而明之存乎其

人子既有得於言語文字中矣推致其功

乃復有得於言語文字外無寧使人謂予

為泥象執文者是則予之至望也予其勉

之至順癸酉上元日嗣三十九代天師太玄子書

收七

二十一